



UKA 2017/127
14.10.2017
Kelly Berthelsen

**Naalackersuisut kingusinnerpaamik UKA 2018-mut ileqqussaasunik
siunnersuisooqatigiinnik pilersitsinissamut siunnersuusioqqullugu
Inatsisartut aalajangiiffigisassaattut siunnersuut.**

(Inatsisartunut ilaasortaq Bendt B. Kristiansen, Inuit Ataqatigiit)

Siullermik Inatsisartunut ilaasortaq Bendt B. Kristiansen siunnersuummik matuminnga pisariaqartinneqaqisumik saqqummiinera pillugu Inuit Ataqatigiinniit qutsaviginiarparput.

Inuiaqatigiit ataasiusut ataasiukannersumik inuuneq pillugu tunngaviusumik paasinnittaaseqartariaqarput taamaanngikkunik inatsisit allallu assigiissumik paasinissaat ajornartorsiutigisassagamikku. Inuunerlu pillugu paasinnittaaseq aallaavigalugu suut eqqortuunersut eqqortuunnginnersullu inuiaqatigiit aalajangersimasumik isummerfigisarpaat.

Qangaanerusoq avataaniit sunnigaaneq annikinnerugallarmat naggueqatigiit Inuit inuunermik isiginnittaasiat ataasiukannersuuvoq. Assersuutigalugu tigumatussuseq ileqqussaangitsutut isigineqartarpoq, kiisalu kiffaanngissuseq pingaartinneqaqimmat inuup nammineq isumaminik atuinissaa pingaartinneqartaqaluni.

Inuillu tikinneqarlutik kristumiunngoramik aamma kristumiut eqqortumik eqqunngitsumillu isiginnittaasiat bibelikkut erseqqilluinnartunik malittarisassiorfiusimasoq malitarilerpaat.

Ullulli nutaat nalliupput, ileqqunik, isiginnittaatsinik, katsorsaariaatsinnik, ilami upperisanik allanillu siulitta takusimanngisaanik bibelimilu oqaatigineqanngitsunik nassataqarlutik.

Inuuneq pillugu isiginnittaatsit assigiinngissitaalersimapput, ilaannilu pingaartumik suliannut atatillugu pingaarutilinnik aalajangiisariaqalersartut tunngavissaaleqileriaataartarput suna eqqortuunersoq. Pingaartumik napparsimaveqarfimmi apeqqutit imaannaangitsut saqqummersinnaapput: Assersuutigalugu: inuk anniarnini pillugu nakorsaatinini atortulersuutiniluuniit peerumallissagaluarpagit nakorsaq qanoq issisimassava?

Aamma, inuit ataasiakkaat kiffaanngissusiat, soorlu killilersugaanani oqaaseqarnissamut kiffaanngissusiat inuiaqatigiit iluanni eqimattanut aalajangersimasunut innarliisutut isigineqalerpat kikkut naliliissappat?

Aamma apeqqutit inunnuinnaq tunngasuusarnaviangillat. Assersuutigalugu apeqqut una isumaliornangitsoornaviangilaq: Inuup iluanaarumassusia pinngortitap erianassusianut sanilliullugu qanoq naleqarpa?

Aap, inuiaqatigiinni apeqquit amerlaqaat eqqortuunerinik eqqunngitsuunerinilluunniit naliliivigisariaqartartut. Taakku arlaannaannulluunniit illiunnani, aammalu ilisimasat pitsaanerpaat tunngavigalugit, inuiaqatigiit tamaasa sinnerlugit naliliivigineqartariaqartassapput.

Tassalu, Bendt B. Kristiansenip Inuit Ataqatigiinneersuup siunnersuutaata akuersissutigineqarnissaa inassutigissavarput. Kisianni soorunami itinerusumik oqaluuserineqarnissaa pisariaqartinneqassappat ataatsimiititaliamut ingerlaqqinnissaa aamma ajorinngilluinnarparput.